

# Periodo di cuater aña di e di ocho Parlamento di Aruba a keda oficialmente cera

**ORANJESTAD** – Ayera dia 28 di October a oficialmente cera e periodo di cuater aña di e di ocho Parlamento di Aruba. Durante un rueda di prensa ayera mainta, prome cu entrega oficial di formado su rapport na gobernador, sr. Paul Croes presidente di parlamento di periodo 2009-2013 a splica cu esaki ta nifica cu e miembronan di parlamento cu t'ey awor aki den e constelacion actual, lo ta haciendo un investigacion riba cartanan di credencial, di e miembronan nobo cu lo ta drelando parlamento. Esaki a sosode den un reunion publico cu a tuma luga ayera 2or di merdia cu tres punto di agenda.

## CREDENCIAL

E prome punto di agenda ta trata e credencial unda e

miembronan di e comision cu a haci investigacion di e cartanan y pa mira si e proceso cu tur e parlamentarionan nobo a pasa aden di a entrega e documentonan corecto, na ora y a cumpli cu e termino pa haci esaki, ta cuadra pa finalmente bay na aproba of desaproba e cartanan aki of eventualmente pidi mas informacion pa locual ta trata e parlamentarionan nobo.

## DESPEDIDA

E di dos punto, ta e discurso di despedida di miembronan cu lo no bolbe mas pa e cuater siguiente añanan den parlamento. Aki ta trata di sr. Booshi Wever, sr. Arondino Croes, sr. Juan David Yrausquin y sr. Paul Croes.

## CERAMENTO DI

## PERIODO

E di tres punto, lo ta e ceramento di e periodo parlamentario 2009-2013. Y diamars dia 29 di october pa 10:30 mainta lo ta e huramento di e parlamentarionan nobo dilanti di gobernador di Aruba. Esaki lo no ta un reunion publico y lo tuma luga den sala di Parlamento di Aruba.

## PRESIDENTE Y VICE PRESIDENTE NOBO

Diaranson 30 di october pa 9'or di mainta, e parlamento nobo lo vota pa e presidente y vice presidente nobo pa parlamento. Dos nomber lo wordo nomina na gobernador como presidente y dos nomber como vice presidente y na e momentonan ey Parlamento di Aruba lo tin un presidente y vice presidente nobo. □

